

29 MAY 1999

Zaharah-Wanita

WANITA UMNO TUBUH PASUKAN GERAK KHAS

KUALA TERENGGANU, 29 Mei (Bernama) -- Pergerakan Wanita Umno menubuhkan pasukan gerak khas untuk memantapkan pergerakan itu di seluruh negara.

Ketuanya Datuk Dr Siti Zaharah Sulaiman berkata penubuhan pasukan itu juga untuk membantu Umno mengenal pasti masalah yang wujud.

"Ia juga bertujuan membentuk konsep kerja Wanita Umno kepada perjuangan yang tulen di samping menstabilkan suasana di dalam parti," katanya kepada pemberita selepas mengadakan pertemuan dengan Pergerakan Wanita Umno negeri di sini hari ini.

Menurutnya, pemimpin-pemimpin wanita akan dipilih di peringkat negeri, dan akan menghadiri satu perjumpaan dengan Presiden parti Datuk Seri Dr Mahathir Mohamad untuk menerima amanat mengenai perjuangan parti, yang kemudiannya akan disampaikan kepada para anggota di peringkat akar umbi.

Siti Zaharah yang juga Menteri di Jabatan Perdana Menteri berkata, pergerakan tersebut akan mengadakan kerjasama dengan pergerakan wanita parti-parti komponen Barisan Nasional (BN), sebagai satu gerakan kebangsaan untuk mengukuhkan parti.

Siti Zaharah berkata pergerakan itu menentang sekeras-kerasnya sebarang pertubuhan bukan kerajaan (NGO) yang menimbulkan masalah kepada negara.

Beliau berkata setiap masalah di dalam negara tidak perlu di bawa ke luar dan kerajaan mempunyai cara yang tersendiri untuk mengatasi dan menyelesaikan masalah.

Menurutnya kerajaan telah menyediakan tempat untuk NGO menyalurkan setiap masalah dan mereka (NGO) mestilah menggunakan saluran yang betul.

Sementara itu, mengenai kerjasama parti-parti pembangkang untuk menghadapi pilihan raya, Ketua pergerakan Wanita Umno itu berkata kerjasama seumpama itu tidak akan ke mana, dan pihak pembangkang perlu melihat kepada prinsip perjuangan parti mereka terlebih dahulu.

"Kita senang bercakap, tetapi jika hendak melaksanakan agak sukar dan janganlah menggunakan isu semasa untuk mengambil peluang mendapat sokong," katanya.

-- BERNAMA

IB SBS RI